

**H**err ein Haus bauen will. Vnd ist doch ein Einiger Gott vnd **H**err / der da redet durch Natan / vnd David verkündigt vnd sein Haus bauet / alle drey ein redener / ein Verkündiger / ein Bauherr. Ob solch vnterscheid der Personen / nicht jedermans vernunft sihet in der schrift / Da ligt nicht an. Ich weis wol / wie sie hie vnd der gleichen örter mehr glosieren / die nase weisen / so den Heiligen geist meistern.

Aber wo du in der schrift findest / das Gott von Gott / als werens zwei Personen / redet. Da magstu künlich auff gründen / das daselbs drey Personen in der Gottheit angezeigt werden. Als hie an diesem ort / spricht der **H**err / das der **H**err will David ein Haus bauen. Item Gen. 19. Der **H**err lies regenen vom **H**errn / feur vnd schwefel zc. Denn der Heilige geist ist kein Narr noch truncken bold / der ein tüttel / schweige ein wort solt vergeblich reden. Regenet nu der **H**err (das ist der son) vom **H**errn (das ist vom Vater) feur vnd schwefel. So ist zu gleich da der Heilige geist / der solchs durch Abraham / oder wers gewesen ist / von den zweien **H**errn redet. Dennoch sind sie alle drey ein **H**err / ein Gott / der feur vnd schwefel regenet. Solcher Exempel wollen wir hernach mehr hören.

**Das**